

Cheeti da pandaa da Pawlo sa Timoteeyo Gimba guri giyaada

Timoteeyo yaa qaraimoo gwaa hhiyumaamida sliimaa haa ya/abimiisay Pawlo koraraa angaa-maka hhiyuuma dosii da kakaaru Gimba gu Hhou gu Yeesu Kristu. Qariqaaqari, Pawlo gugi ya/abi ina, ma giyaadimiisay gu kanisaa da yaamu gu Efeeso tleehhidi.

Pawlo yaati ya/abi cheetiti daqa Timoteeyoge, maguu gadimi ina gimba gu firiiriru Iliitleemu kanisasuuge haa gimba gu ilafataqa da maari-mamaa da afa'afuuma. Slime, Pawlo hiti ilakesaasidi tuba, ti hida gu malee waaree diginii leehhi ma giyaadimiisee da kanisaa tleehhidiri. Kara, ina hiti ilakesaasidi, idoo giyaadimiisee da kanisaa gi ilii yondiidiyee haa qaraiya, gaduũ haa mogombiisee.

Cehheemisuu gu Pawlo daqa Timoteeyoge

¹ Ana Pawlo, ya/abimiisay gu Gimba gu Hhou gu Kristu Yeesu hari ilakaawaraa da Iliitleemu ilabu'umiisay goori haa da Kristu Yeesu goó iliipa'aa'ane, ² ha handikiikima cheetiti daqa doogu Timoteeyo. Ugu ti nankoy loi pahha daqa doonii /imba da Kristuge. Ana ha firiir-ima Iliitleemu, Taataa goori haa Kristu Yeesu, Looimoo goori gu Goõ, sugu laqane hhoiay gosi

gu didiru, sugu /awaarine, kara sugu qaye ibinaa da qasaw.

Hiigadiruu gu Timoteeyo sa maarimamaa da afa'afuumaa

³ Qatlay saa ilii hhiyuumaamide yade Make-dooniyage, hagwaa tlaatlaqasi ugu kwanda ga mete te'esii yaamu gu Efeesoge, ma ilakaadi hida wakinay te'esii, ma mayri caacaahhamisu gu afa'afuumaa. ⁴ Kara ilakaawaki, ma mayri catimisu guba faydaa haa faadoo da tleedi da umañ gu okookoñ koina. Gimbakee haroóti khay naanaqamoo tla/aã gooinay, kara yoó ilakonaaba pandaage yondu gu Iliitleemu, doó yondiidiye hari /imba. ⁵ Inkoo, piimaa da ilakaawarati, ti sla'amuu goó muuna gu /abaaku dahha, gu khua idoo doó iliicaahhiye hhoinay haa siaraa da tlakwaroo, kara goó laqama /imba da loi. ⁶ Hida wakinay yaa mayri sla'amukee gu hhou, gii fookidiri sa idara gu bawma. ⁷ Inay yoóti slaiyay, ma digi caahhi ha hida wakinay maarimamaa da sariyaa pahha. Kara tay inay ma gimbakee see giyoó cocoiyeei, gu lou ma'aana dosi gi hhidinay nara'a, gimati gimbakee see giyoó cocoiyee hari /atlimaa.

⁸ Dandiray ha khuana tuba, gimba daa hand-ikimi sariyaa da Iliitleemuge guti hhou, bere hida giyoó iliikonay caacaahhamisu nara'a. ⁹ Kara dandiray ha khuana tuba, sariyatee dagaati qaasiiba sa hida goó yondiidee hhoinay pandaada da Iliitleemuge. Sariyatee dagaati qaasi sa hida goóba /imba sariyaa lensee, goóba itatiimisu, goóba muriida Iliitleemu, haa gu

koomee tlakwaroo. Slime, dagaati qaasi sa hida hhaã goóba tlinti'isa ibinaa dooina sa Iliitleemu, hhaã gu slaee kooroti, goó cu'ee hari taariru ayii haa amu koina haa hida wakinay. ¹⁰ Kara sariyaa dagaati qaasi sa hida gwaa slipalauumidee, guroó guee hhawatee dene'ee koina, goó ooyimee dene'ee koina sa kiriga tongee pahha, afa'afuusee, goó seeliilimee gimba gu afa'afuuma, haa gimba waku goõ goó tlatlankima caacaahhamisu gu lou. ¹¹ Caacaahhamisukee gu lou ti wana Gimba gu Hhouge goó laqama wanqamee da Iliitleemu, hiĩ sinaa taataahi ha Iliitleemu magu kakaami.

Áisoo da Pawlo sa/awaariru gu Iliitleemu

¹² Ana kaawa Áisoo sa Kristu Yeesu Looimoo goori, hiĩ sinaa qaw Áuuru, sa gimba hinaa faadi tuba, ana hinaa Ámbi, kara hinaa hiileehhi, ma sugu yondiidi. ¹³ Waka'alee Kristu hagwaa pende'esi, gwaa laba'asi, kara hagwaa wahaa-hama ina. Teesaaqay see, sinaa Áawaarimi, sa gimba hagwaa kahha Ámba, kara bawma dooii haa caahhiiba gimbakira gaa yondimaamide.*

¹⁴ Taataa Iliitleemu sinaa pihhi hhoínay gosi gu didiru hari khisla. Kara sinaa qay Áuuru gu Ámba Kristu haa Áuuru gu sla'amuu hida wakinay ilagaasaraa doorii daqa Kristu Yeesuge.

¹⁵ Kaawarati dati loi, kara hagati Ámbane loi muunaĩ kotii tuba, Kristu Yeesu yaati khay ti'ii koorotii, sa ilabu'uru gu hida gu koomee tlakwaroo. Kara tla'ã gu hida hhakeesii goõ, ana na asu kooma tlakwaroo hari khisla ba/ay

* **1:13** 1:13 Yu'udii kitaabuu gu Yondu gu Ya/abimiisee 8:3; 9:4-5.

da inay seei! ¹⁶ Inkoo, sa gimbakee Kristu Yeesu sinaati arimi ana /awaariru. Yaati laqami hiikaasa dosi da didiri daqa dooi, heedi gwaa kooma tlakwaroo wa/a ba/ay da hida wakinay see goõ. Ana dinima arimi amoo pahha daqa hhaka'ay gumaa /imbee qariqaqari, ma slayri ibinaa da koraraa haa koraraa goõba hiifaakoo. ¹⁷ Teesaaqay, muree haa wanqamee da ina lenkosi ti kosi ina Mutemi goó ibiida koraraa haa koraraa goõba hiifaakoo, goõba gwaa'araa, doõba arimaa, ina leẽ na Iliitleemu koraraa haa koraraa goõba hiifaakoo! Guti lou.

Ilakaawa da Pawlo sa Timoteeyo ma karahasi/imba dosi

¹⁸ Timoteeyo nankoy, ooyi ilakaawati doó khoca sliimaa haa tletirukira gu waka'alee, daa tletimi daqa dooguu ha tletimiisay. Ilakaawati na khasima googu, ma gauusidi gau gu hhou gu Iliitleemu. ¹⁹ Kara karahasi /imba Kristu haa slay ilahudaa gu hhoi. Hida wakinay yaa mayri caahharaa hhoi hoo haa gi si'iri tlakwaroo, teesaaqay yaa hhamisiri /imba dooina daqa Kristuge, meelita'a pahha daa tlakwaakwadi rawaa gu hhafidaduge. ²⁰ Tla/aã gu hida hhakeesii wanay Himenaayo haa Alekisanda. Inay giyaa taatahhi sa Sataanimoo, ma digi caacaahhamisi, ma hhanti pende/esiri Iliitleemu.

2

Caacaahhamisuu goó sliimaa khoca haa firoo

¹ Inkoo ana hangu sla'a geesaai, mangu tlaat-laqasi unkuray tuba, gimba sliimaage firima

Iliitleemu sa hida goõ. Firima Iliitleemu, ma iliia y hida ibinaa dooinay, firiirima sa wakinay, kara daareesa Iliitleemu sa inay. ² Firima teesaaqay sa watemi, haa hida hhanki goõ gu deni gu tawaaloo ge waaree, ma slayni ibinaa daa kaanahasidi haa da qasaw, doó muriida Iliitleemu haa da koomaa muree pandaa da hida sliimaage. ³ Firoti da taqay slanqasa dati hhoi, kara yoóti hha'aleesida Ilabu'umiisay goori Iliitleemu, ⁴ goó sla'a hida goõ, digima ilabu'umi tlakwaroogo haa ma caahhiri gimba gu lou. ⁵ Sa gimba Iliitleemu ti leẽ, kara wana ilagaasimiisay leẽ gwaa qadidu tla'ange, ina naa ilagaasi Iliitleemu haa hida kosi. Heediki ti Kristu Yeesu, ⁶ hingaa hadisi ina lenkosi musalaabage, sa afiigweedaraa da hida goõ. Ina nayii tlaa'asi gu lou ilatahharaa dosi Iliitleemu, qatlay gosi giyaa ilii bu'udi.

⁷ Inkoo, hari ilatahharatee Iliitleemu hinaa hiileehhi, ma kakaami Gimba gu Hhou gu lou gu Yeesu. Slime, ma leehhisi gimbakee daqeemoo paslaapasloo haa ma caacaahhamisi ya'aboti da áimba haa da loi sa hida gu hhapapu wakinay. Gimbaki ga giimaamise guti lou, hanguu coraari-daaba.

⁸ Teesaaqay daqeemoo sliimaage, qatlay goó ilii kurunkuritee, ana sla'a hhawatee goõ firinee hari muunaĩ guba qupidaa ma naanaqamoo see, gii tlaysii dabaiĩ koina rawaage, ilakhuukhu'usa haa ibinaa daa tlinti'isi pahha daqa Iliitleemuge. ⁹ Kara ana sla'a tigay daamisiyee qayroo gu koomee muree haa goó ga'awee waaway gooina, kara goóba laqaruu tuba, hingoyii akhasiyayi

inay kilakoina. Hhanti sukunay sagaiĩ koina, hingi hhanti /aliidiyay hari sahaabu, idadu gu kaari, kara hhanti daamisiyay qayroo doó kirigiye hari peesay wa/a. ¹⁰ Inay ba/ay hingiti /aliidiyee hari yondu gu hhou, idoo digoó ilii slaiye gooay tigay goó /mbee tuba, Iliitleemu ginoó firiirinay muunaiĩ koinay.

¹¹ Tigay itatiimisiyee caacaahhamisu gu gimba gu Iliitleemu hari qabidinoo haa murumu'uuma.

¹² Ana tigay hagiyoó geemawaaba, ma caacaahhamisiri hhawatee, ma koisa see laqaru /uuru gooina rawaa koinay. Caacaahhamisuge tigay kwanda gi qabiyeei diĩ. ¹³ Sa gimba Iliitleemu Adaamu gunaa geesa tleehhi, da hhe'esi higi asu tleehhi Haawa. ¹⁴ Karaai yaati Adaamu gooba daa hiicori ha Sataanimoo, yaati Haawa daganaa hiicori, gii gunti tlakwarooge sa dakusaraa da ilakaawa da Iliitleemu. ¹⁵ Teesaaqay see tigay digi ilabu'una hari amoo da laqwaloo ya'ay, bere inay ilakonay /imba Kristu, gi slaiyay hida wak-inay, hingigi tlinti'isiyay sa Iliitleemu, hingigi ga/ay hari waaway.

3

Lawaalee da Kanisaa

¹ Kaawarati dati loi, bere heedi waku hiĩ slahhaai muuna gosii hari khisla, lawaalimoo tleehhida,* ina yondu gu hhou gu kooma muree guniĩ slahhaai. ² Inkoo, lawaalimoo ti heedi

✧ **2:13** 2:13 Yu'udii kitaabuu gu Tlaatleesoo 2:7, 21-22. ✧ **2:14** 2:14 Yu'udii kitaabuu gu Tlaatleesoo 3:1-6. * **3:1** 3:1 lawaalimoo tleehhida: Angamalee askoofu.

doóba ilii kaawaraa gimba gu tlaku, hhawata gu hadee leẽ, hingiroó hiikiki'a ibinaa dosii, heedi goó ilahudeesa hingigi ga/ay hari waaway, doó muriidiye, goó kwahhasuusa hida mara gosii haa gu khua caacaahhamisu gimba gu Iliitleemu. ³ Kwanda ti oonimiisay goóba, gu waka qwatla haa hida ba/ay gu kooma wariiakhasoo, goó sla'a ibinaa da qasaw haa goóba sla'amuu peesay. ⁴ Lawaalimoo kwanda gi warii qadidiye hida gu mara gosi loi nara'a, kara gi omi ya'ay kosi nara'a, magu akhamisiri hari muree sliimaa. ⁵ Ma'aana, bere heedi hhidina, idoo gi ilii wariiqadidiye mara gosi loi nara'a, malee hiidahhasi omidoo hida gu kanisaa? ⁶ Lawaalimoo ti heedi gu segu tleehhidiye /ambaraa da Yeesuge, hingimaa ba/ati hiiakhasi muuna gosii, dugugi asu /agitina, idoo Iliitleemu giyaa ilii /agatimi gooyay Biriisimoo. ⁷ Ina duguti hha'aleesiye ha hida gu kahhee/imba Yeesu, dugumaa hhanti ilawaamisi ha hida, gii huui hatliroo da Biriisimooge.

Yondimiisee doó iliia'awa yondu gu kanisaa

⁸ Nama teesaaqay yondimiisee da kanisaa inay seei digi muriidiye ha hida, hhanti hida gu afañ cada cada tleehhidiyay, goóba ooniimidu, kara goóba dabiiduu idadu haa peesay hari amamu guba ilamuree. ⁹ Kwanda gi ooyiyee gimbakira gu wa'ay gu /imba dooina, teesaaqay laqaraage hhanti arinayi ilamuree caahharaa da tlakwaroo ibinaa dooinay. ¹⁰ Kwanda digi geesaa ilatahhiye ha hida gu Kristu kanisaage, bere digi arimi tuba, digoóba ilii kaawaraa dakoo lensee,

te'esii digi asu hiigeemaye yondu gu kanisaage yondimiisee pahha.

¹¹ Nama teesaaqay leē, tigay gu yondimiise-tee see kwanda digi muriidiye ibinaa dooinay, hhanti hida goó hhareedee dene'ee koina tlee-hhidiyay. Ba/ay hingiti ga/ayee ibinaa dooinay haa digigi/ɓmbi gimba sliimaage.

¹² Yondimiisay gu kanisaa kwanda ti heedi gu hadee leē kilesi tleehhidiye, goó oma ya'ay kosi nara'a haa goó wariiqaadida mara gosi nara'a. ¹³ Ma'aana yondimiisetee da kanisaa doó yondiida yondu gu hhou, yoó slayay muree da didiri kanisaage haa/atlimaa/ɓmba dooinay daqa Kristu Yeesuge.

Gimba gu wa'ay gu/ɓmba doori

¹⁴ Inkoo, kooma slime iliipa'aru gu khawaraa daqa dooguu ciraai. Teesaaqay see sugu handiki-ikima ugu caacaahhamisukee, ¹⁵ ana bere hoyii kaa'a see khawaraa, ugu hoó caahhada idoo hida digi iliislaiye ibinaa mara gu Iliitleemuge. Maraki ti kanisaa da Iliitleemu gu slafa, kara ti unguruiya haa musingi gu lou. ¹⁶ Gonkotaa haã /ɓmbani tuba, siiri da diini doori da didiri, inkoo dagaanii tlaa'asi gu lou:

Kristu dugwaa hiitlaa'asi hari slaqwa da heedi,
 dugwaa laqami gu lou guba tlakwaroo ha
 Muuna gu Iliitleemu,
 dugwaa arimi ha malayika da Iliitleemu,
 dugwaa kakaami tla/aã gu hhapapuge,
 dugwaa /ɓmbi ha hida koorotii,
 duguraa waaudi rawaa gu rawge daqa wan-
 gamee dosii da ina lenkosi.

4

Maarimamaa da afa'afuumaa

¹ Inkoo, Muuna gu Iliitleemu yoóti kakaana sa dandiray yakwaraa see guba tuba, balalu gu hiifaakooge hida wakinay kwahhiyay /imba dooina, gi tooina akhamisiyayi muunaï goó hiicoridee haa caacaahhamisu gu Sataanimo.

² Caacaahhamisukee gu afa'afuuma dugoótii qoomeesi ha hida gwaa peerehhumidee haa gwaa afa'afuumidee. Inay yoó hiidahhasiyaaïba caahharaa gimba gu hhou haa ma siaraa da tlakwaroo see, sa gimba muunaï koina yaati kaka/iri ubee, digaati daada/ami pahha hari sikhimaka'a gu kooma aslaa. ³ Hida hhakee yoó tlaatlahhamisiyay hida hhanti khabiibinay, kara yoó /uureemisiyay hida hhanti /aginay /agoo waka, daa boo/imisi ha Iliitleemu hari ilataharaa hhakee goó /imbee Kristu haa gi caahhiyay gimba gu lou, ooyiyee hari amoo da daaresaraa. ⁴ Ma'aana idadu sliimaa daa boo/imisi ha Iliitleemu guti hhoi, kara hhaka idoo lensee daa kitlakuusi, bere ga oowana hari amoo da daaresaraa, ⁵ sa gimba idadu hhakee digaati tlinti'isi sa Iliitleemu hari gimba gosi haa firoo.

Yondimiisay gu hhou gu Yeesu Kristu

⁶ Sigii slaslayde gimbaki, hhiee goó /imbee Kristu Yeesu. Teesaaqay, ugu ha yondimiisay gu hhou tleehhita gu Kristu Yeesu, hiï daa /agimisi gimba gu hhou gu /imba doori haa caacaahhamisukira gu lou, hiï goó sirakonte. ⁷ Inkoo, sie sumuku catimisu gu kooma tlakwaroo da kooroti, kara catimisu guba ma'aana, ba/ay ugu

hanguti caacaahhamiside ibinaa daroo khawa muree daqa Iliitleemuge. ⁸ Ma'aana caacaahhamisu gu slaqwa haroo khay faydaa coko'u, teesaaqay see caacaahhamisu gu ibinaa daroo khawa muree daqa Iliitleemuge, haroo khayda faydaa daqa idadu sliimaage, kara sidooyi fadidi gimba gu hhou ibinaa da inkooge haa daa khocage. ⁹ Kaawarati dati /imba, kara haraatii boo'odi, ma daga /imbi sumuku ha hida. ¹⁰ Haã na idoo saay karahhani yonduge hari khisla, haã qaasani iliipa'aru goori daqa Iliitleemu gu slafage, hiã gu Ilabu'umiisay gu hida sliimaa, hhaka'a loi goo /imbee ina.

¹¹ Ugu, gimbaki sliimaa ilakaay haa caacaahhamisi hida goo, magu sirakoniri. ¹² Inkoo, ugu hhanti /imbida duguma qooqiidi ha heedi lenseei, sa gimba ugu ti qaraimoo. Qadidi nara'a, hida ma sirakoniri idoo goo ilii ibite, sla'amuu koku, /imba doogu haa ibinaa doogu doo laqama muuna gu/abaaku. ¹³ Maati amoolaa khaw, haysi qatlay googu sa somaa Handikaa da Iliitleemu pandaa da hidage, kakaamii haa caacaahhamisi. ¹⁴ Ilakoomi yondu hari/uurukira gu muuna, gwaa slaydi hari amoo da gimba gu tletimiisee, qatlay dugwaa ilii firimi ha gaduũ gu kanisaa hari amoo day qamiduu dabiã. ¹⁵ Ilatahhe hari khisla gimbaki suguũ kaay, kara hanguũ ca/aside sumuku, magu yonditi, hida sliimaa ma aniri ibinaa dooguu, haa /imba doogu daqa Kristuge giyoó ilii roogite. ¹⁶ Hangu ga/ayde nara'a, idoo goo ilii ibite, kara karahhasi gimba-kee kilesi gu lou goo caacaahhamiside. Ilakoomi

gimbaki, ma'aana teesaaqay laqaraa, Iliitleemu ilabu'una ugu haa hhaã see goó itatiimisee ugu.

5

Ilakaawaraa daqa gaduũ // haa tigay daa afahhamaahhami hhawatee

¹ Gaduwaa hagu hhanti ilii/oo/oda hari dihay. Tlaatlaqasaku hari muree taataa googu loi pahha. Qaraiya sigi teesaaqay yonditee ubee ti, hhiee koku loi pahha, ² muriidi tigay gwaa gadumidee ubee, amu koku loi pahha, kara muriidi tigay gu sgameeru hari muuna gu hhou hari khisla ubee, hhiee koku loi pahha.

³ Laqami muree nara'a, sa tigay daa afahhamaahhami hhawatee koina, gu slae iliiawaraa da loi loi. ⁴ Teesaaqay see, bere hadee daa afahhami hhawata konta ya'ay, angamalee konta okookoiĩ, hhakee kwanda hingi gesaa caacahhamisiyee hiigaasaraa /uuru gooina pandaa da Kristuge sa hida koina. Teesaaqay ki'isiyay iliiawaraa daqa ayiĩ haa okookoiĩ koina. Caahha gimbaki yoó muunaboo/eesi Iliitleemu.

⁵ Hadee daa afahhami hhawata gosi, haã doóba heedi lenseei gu iliiawaraa, ina Iliitleemu ginoó iliipa'anta sumuku. Amasi haa tleemaa ina Iliitleemu kilesi ginoó firiirinta, dagama iliiay. ⁶ Kara tay hadeta'a daa afahhami hhawata, doó ibiida sa slahhaahhaau gu idadu paslaapasloo gu kooroti, gimati slafidi see, hatee muuna gosii yaati gwa'ati. ⁷ Hida sigi kaade caacahhamisukee kanisaage, ma digima may ilii kaawaraa gimba gu tlaku. ⁸ Bere heedi may omidoo hida

kosi, hida hhaka'a loi gu mara gosi, hikee hii tlanki /imba dosi, kara ti tlakwaroo hari khisla, ba/ay da heedika'a see goóba /imba Kristu.

⁹ Inkoo, hadee daa afahhami ha hhawata gosi, uma gosi dugu hantii roogisi daqa umaï gu tigay wakinayge daa afahhamaahhamige hhawatee koina, bere kakhada dawaraa koraraa mibeeri laho'o. Kara kwanda giyaa konte ibinaa da /imba daqa hhawata gosii,* ¹⁰ daga caahhiye hari ibinaa dosi da hhoi. Ina yaa ominti ya'ay kosi nara'a, doó kwahhasuusa hida aya gosii, doó hhunca ye'eeroo gu hida gu Iliitleemu, doó iliia'awa hida goó koomee laba'asu, kara hingaay ca/asidi sa yondu paslaapasloo gu hhou.

¹¹ Hhanti /imbida hiiroogisa umaï gu tigay gu kahhee sgameeru umaï hhakeesii, sa gimba qatlay slahhaahhaau gooina gimaa hiiroogidiye maa kabaí sla'amuu gooina gi konee daqa Kristuge, gi slaiyay kara digima khabiibimi.

¹² Hari amotee harimaa khayay /agitiru daqa dooinay, sa gimba ma mayay seelirukira koina gu tlaatleeso, giyaa ilii kaayri tuba, digimaa kara khabiibinaaba. ¹³ Karaai, tigay hhakee hingoóti caacaahhamisiyay ibinaa da naa/ama, inay yoóti hemberuusiyyay maraai haa maraai. Kara ti naa/ama kilesiiba, slime yoóti hhareediyyay hida wakinay, digiba kwahhasuusa see yoótii gunay daqa gimba gima kooinaaba see, gi tooina cocoiyyay gimba doóba coco'omoo. ¹⁴ Teesaaqay ana ti sla'a sgameeru da afahhamaahhami hhawatee, digima khabiibimi, gi slayay ya'ay

* **5:9** 5:9 ibinaa da /imba daqa hhawata gosii: Ina kwanda yaati hadee da hhawata leë.

haa gi khu'unay maraai koina, fa/ayaa doori ma dakusiri amoo dari wahaaharu hida gu Iliitleemu. ¹⁵ Ma'aana tla/aã gooinay wakinay yaa hhe'esiri yaay fookidiri gimba gu lougo, ma sirakoniri Sataanimoo.

¹⁶ Kara sla'a kaawaraa, bere wanta amaa doó /imba Kristu, konta hida daa afahhamaahhami hhawatee hiidayuuma dosii, gi ominte. Hhanti ilii mayda kanisaa, ma daga ilii loay, ba/ay kanisaa ti omide hida hhakira loi gu slaiyeei iliiawaraa da loi loi.

Gaduũ gu kanisaa

¹⁷ Gaduũ gu kanisaa goó wariiqadimidee nara'a yondu gu kanisaa, haraa hiiboofiri slawaraa muree ha bu'umaa gu hhoi, hhaka'a loi goó kakaamee nara'a sliimaa haa goó caa-caahhamisee gimba gu Iliitleemu. ¹⁸ Ma'aana Handikaa da Iliitleemu yoóti kakanta tuba, "Hhanti khiidinta afa gu karaamoo qatlay giyoó ilii kala/ane baruũ,"[✧] kara "Yondimiisay see haraa hiiboofiri slawaraa da bueemaa kosi."[✧] ¹⁹ Hhanti /imbida itatiisaraa sitaakaa lensee da gimba gu gaduwaa gu kanisaa, daroóba khawaraa ha masaydii cada, tami.[✧] ²⁰ Gaduũ goó ilakoomee ibinaa tlakwarooge, ilii/oo/akii pandaa da kanisaage, wakinay see ma ilagwaa/iri.

²¹ Haguũ ilakaay pandaa da Iliitleemuge, da Kristu Yeesuge haa da malayika daa hiileehhi ha Iliitleemu, iliikoomi hiigadiruki hagu hhanti paslimisida, kara hhantii leehheda heedi

✧ **5:18** 5:18 Yu'udii kitaabuu gu Hiislaslaw gu Sariyaa 25:4.

✧ **5:18** 5:18 Yu'udii kitaabuu gu Luuka 10:7. ✧ **5:19** 5:19 Yu'udii kitaabuu gu Hiislaslaw gu Sariyaa 17:6; 19:15.

lensee yondu googuu. ²² Hhantii slehheesida iliigamiduu dabañ hida wakinay, ma slaydi gaduñ wakinay gu kanisaa. Kara hangu hhanti ilagaasida haa tlakwaroo da hida wakinay, ba/ay ugu hanguti ga/ayde nara'a ibinaa dooguu.

²³ Hhanti ilakonta kitahhuu ma'ay kilesi, ba/ay kitahhi coko/o difaay† daa mahhaa'adi, sa gimba gu gura'a googu haa sa ga/ay googu goóba qabisa.

²⁴ Slayii hida wakinay tlakwaroo dooina cenceege wanta, kara yaati giyati pandaa da hukumuuge. Gimati teesaaqay see, tlakwaroo da hida wakinay, yoóti sirakonta aluñ koinaa, ma'aana dagoó qariqaaqari caahhi. ²⁵ Nama teesaaqay, yondu gu hhou gu hida wakinay cenceege wana. Kara yondu gu hhou see goóba cenceege waara, hingoó hiica/asi qariqaaqari.

6

Tongee

¹ Tongee goñ da kooma /imba, kwanda gi laqaneei muree hari khisla sa looe dooina, hida ma mayri wahaaharu uma gu Iliitleemu haa caacaahhamisu gu Kristu. ² Tongee da kooma looe da kooma /imba daqa Kristuge, hhanti dakusiyay laqaru muree daqa dooinay, sa gimba inay ti hhiee koina iliipa'aruge. Ba/ay ti yondiidiyee nara'a loi sa inay, sa gimba looetee doó slawa faydaa yondu gu tongeteesaa, ti hida goó /imbee, kara ti hida doó slaiye.

† 5:23 5:23 difaay: Buraa da/aamu waku daa tinqimi, uma gosi naa sabiibu.

Caacaahhamisu gu afa'afuumaa haa hindaqaruumaa da loi

Caacaahhamisi hida gimbaki gu lou, kara /atlisii muunaiĩ koina, magu akhamisiri gim-bakee. ³ Heedi goó caacaahhamisa gimba gu afa'afuumaa, goóba /ambaraa gimbaki gu lou gu Looimoo goori gu Goõ Yeesu Kristu haa caacaahhamisu guroó khawa muree daqa Iliitleemuge, ⁴ muuna gosii hingoótii akhasi ina na ina, kara ti hhidina idoo lenseei. Heedikee saga gosi yaa tlakwaakway, siginoó kona sla'amuu gu tlaku gu kabaaba/ú gimba doóba caahharaa nara'a haa naanaqamoo gu diitiray sa ma'aana da gimba. Coco'omoki gu tlaku haroó khay tloomu, qwatla, wahaaharu haa iliitlohhidu gu tlaku. ⁵ Kara haroóti khay naanaqamoo balalu sliimaa tla/aã gu hida sagaiĩ koina gwaa hacee ilahudaa gu tlakwi, gu hhidimee gimba lensee gu lou. Hida hanki yoóti ilahudeesiyay tuba, diini na amoo dari slawaraa hindaqaruumaa.

⁶ Teesaaqay see, heedi yoó slay faydaa da didiri ibinaa daroo khawage muree daqa Iliitleemuge, haa gi bu'udisi hari idadu gi kone. ⁷ Ma'aana qatlay dandiray dandoó ilii laqwaliye, haroó khaynaaba idoo lenseei ti'ii koorotii. Kara qatlay goó ilii kaka/ane, haroó waaudanaaba idoo lenseei. ⁸ Teesaaqay, bere kona /agoo haa qayroo, haã bu'udisani hari idadu hanki. ⁹ Caahha hida goó slashhaahhaaee cira, ma slayri hindaqaruumaa, digoótii dafimidi tlakwarooge, digoóti ooyina hatlirooge haa gii huhuiyay slashhaahhaau wa/age gu tlaku gu bawma. Slash-

haahhaauki yoóti tlakweemisi ibinaa dooina sumuku, digigi hhamisi gu lou. ¹⁰ Ma'aana sla'amuu gu peesay, ti tlaatleesoo da tlakwaroo sliimaa. Slahhaahhaau gu peesay yoó /sina hida wakinay, ma tlingitlingimidiri segeẽ haa /imba Kristu, gi slayay ilahufiduu muunaĩ koinay sa slahhaa'amee wa/a.

Pawlo idoo giyaa ilii tlaatlaqasi Timoteeyo

¹¹ Inkoo ugu, Timoteeyo heedi gu Iliitleemu, /pii gimbakee goõ gu tlaku. Ilakoomi ibidinaa ibinaa daa tafa'adi pandaa da Iliitleemuge, daroo khawa muree daqa Iliitleemuge, /mbi Kristu haa slae hida. Balalu sliimaa dugu hhanti muuna tlupi, kara ibiidi ibinaa da aslaa'amee. ¹² Qwaatli qwatla gu hhou gu /imba. Karahhasi ibinaa doogu da koraraa haa koraraa gooba hiifaakoo dugwaa ilii eteedi ha Iliitleemu. Teesaaqay laqe, qatlay gaa ilii /mbidi Yeesu pandaa da masaydii wa/age. ¹³ Inkoo hagu sla'a ilakaawaraa pandaa da Iliitleemuge, goo qawa slafimaa sa idadu sliimaa, haa pandaa da Kristu Yeesuge, hi gwaa ilakeesu nara'a pandaa da Pontiyo Pilaatu, gimba gu iliipa'aru gosi, ✧ ¹⁴ itatiimisi hari khisla ilakaawaratee suguũ kaay, damaati amoo ki/ Looimoo goori gu Goõ Yeesu Kristu.

¹⁵ Iliitleemu namaa hiitlaa'asi Kristu, qatlayka'ay loi gimaa iliislaiye ina. Iliitleemu dugunoó daareesi ha hida, hiĩ gu leẽ goo tawaalooge waara, Mutemi gu watemi goõ haa Looimoo gu looimaiĩ goõ. ¹⁶ Kara ina lenkosi noo gwaaiyaaba, noo ibiidi cenceta'ay doo wanqa

✧ **6:13** 6:13 Yu'udii kitaabuu gu Yohaana 18:37.

hari khisla, doóba iliisataraa ilaciyaage ha hida. Gu lou, hhaku heedi gwaa arimu ina may dah-hasa see arimaa. Hida muriidiyeei Iliitleemu, goó tawaalima hari /uuru koraraa haa koraraa goóba hiifaakoo! Guti lou.

¹⁷ Ilakaay hindaqeeru gu kooroti da inkoo, mangu hhanti hiiakhasiri, kara ma hhanti qaasiri iliipa'aru gooina hindaqaruumaa doóba hiikaasaraa. Ba/ay Iliitleemu gini iliipa'anee, hii sandoó hadimisa idadu goó sa hha'aloo doori.

¹⁸ Ilakaawaki hida hhakee, ma ibiidiri ibinaa da hhoi, yondiidiyee yondu wa/a gu hhou pandaa da Iliitleemuge, ibiidiyeei hari cabuuma, ilia'ayee hida wakinay hari hindaqaruumaa dooina. ¹⁹ Hari amoti maa slayay sa inay hindaqaruumaa da loi, musingika'a pahha daa tleehhi nara'a daqa ibinaa dooinay da pandaage. Teesaaqay gi asu karahhasiyay ibinaa da loi.

²⁰ Hhia Timoteeyo, ga/ay nara'a gimbakira gaa oodi daqa Iliitleemugo. Hangu tlinti'iside ha gimba gu kabaaba/u haa idara gu bawma, guroóba khawaraa muree daqa Iliitleemuge, hii giyoóti eteedinee hari cirihhimaa “Caacaahhamisu gu lou” kara ti teesaaqay gooba.

²¹ Hari karahhasaraa da caacaahhamisukee gu afa'afuumaa, hida wakinay yaa hhamisiri amoo da loi da iliipa'aru gooina.

Inkoo firoo doyi na nahaã ambee, hhoinay gu didiru gu Iliitleemu ibiidiyee haa unkuray gonkokunaa.

**Ilaʼimbidu Gu /abu hari Burungaisoo
Burunge: Ilaʼimbidu Gu /abu hari Burungaisoo
(Bible)**

copyright © 2019 Wycliffe Bible Translators, Inc.

Language: Burunge

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source
files dated 29 Jan 2022

5fd9f69c-03b6-5343-85b8-5043bec70185